

南音《六姑回門》之《吉日迎親》

歡迎複印，妙韻廣傳

(起八板南音板面)

中板

言再講，事情多。觀旺今朝，娶老婆。但家道艱難，
真苦楚。分明賭仔，係初哥。李公夫婦，同商議。
呢場嘅好事，唔知點如何。前月收銀，有幾十。除了
一切使用，如今有幾多。目下不過剩銀，三五個。
可從何處，去移挪。睇來酒席就必然，係辦唔妥。

今日花轎臨門，好事多。我哋親戚雖然，無乜幾個。
但荷包限定，惡張羅。新郎哥佢不獨，無袍褂。買雙
鞋襪，好奔波。邋塌衫褲唔能，咁就新做一套。渾身
無寸，係綾羅。(短腔) (接短序收)

慢板

忙執拾，掃廳堂。垃圾將來，拂到光。觀旺裝身，穿
吉服。戴起紅英大帽，甚有排場。布鞋襯對，穿窿襪。

中板

仲有紅頭繩兩尺，幾相當。洗水長衫，烏布馬褂。威風凜凜，做新郎。

忽聽門前，吹打響。人夫齊集，震街坊。後母自家，將轎照。賺回利市，亦何妨。會友一班，同步到。

原來賭仔，到此相幫。廳上擺返幾張，條板檯。兄弟分開，坐兩旁。（短腔）（接短序）

時已至，日當中。吹打連聲，掌大筒。一眾人夫，催

起轎。相請媒人，就擺盅。母親王氏，呼嬌女。你兄

今日，喜乘龍。金喜聞言，承母命。將身移步，入堂

中。低聲先把，嚴親叫。又睇見兄台，佢醜怪嘅面

容。衫袖拂長，佢就將手拱。果然似隻，大蝦公。

拜罷起身，移玉步。佢就失意唔知，跌散腳籠。鞋帶

甩時，拖地伏。一交就跌倒，在堂中。搞到眾人拍

掌，呵呵笑。分明好位，女嬌容。嗰陣燒酒都飲得，

中板

拿拿餌。就時引轎，出街中。喧天鼓樂，人擠擁。不歡容處，也歡容。(短腔)(接短序)

齊起轎，去胡家。敲鑼響鼓，又打鑼。不覺行程，胡宅近。聽聞鼓樂，震喧嘩。立即滯門，唔在話。三封利市，作飲茶。嗰個媒人入內，稱恭喜。安人叫句，笑哈哈。六姑房內，高聲嘆。高聲嘆。

乙反

哭罵媒人，咬碎牙。(短腔)(無限序)六姑怨，哭媒人。吱嘲三嫂，怎聽唔真。大嫂入房，把姑妹勸。即便同姑，理鬢雲。二姑與姑，將腳換。着起花鞋，照眼新。大姑餵六姑，食雞髀飯。食完洗面穿衣，正是未時辰。六姑無奈，穿圓領。鳳冠戴起，蓋頭巾。親父入房，將女抱起。

慢板

佢就將女抱起。六姑苦切，哭幾句天倫。(長腔)

(接短序收)

說白

「阿爹，女兒今日出門嫁人，是禍是福都唔知道，你哋記得要強飯加衣，多多保重。」「阿女、你唔洗擔心嘅，你一定可以好好咁生活㗎喇。」咁就唔好講咁多啦。

板眼

胡公抱女，堂前去。佢將兒放入，到轎中心。轎內六姑，身坐穩。但就依然啼哭，苦沉沉。唉，佢係苦沉沉。佢就把道轎門，門到緊。聽見人夫奏樂，亂紛紛。炮竹響連聲，抬起轎。媒人依舊，轎先行。轎先行。花轎轉頭，唔運路。一直回歸，果是真。嗰陣李宅聽聞，啲啲打打響。佢就即便將門，閉幾曾。到外便，派啲人，佢就收蠟燭。新郎快快，快快去裝身。等到轎到大門，無幾耐。掌號開門，理正行。睇住花轎抬埋來，門口放。姑爺企住，喺個桌中心。接嫁三回，來跪下。跪跪跪。新郎出門外，佢就接新人。佢

輕輕踢轎門，三兩下。姑爺踢完，即轉身。大姪
姐，將新娘送下轎。直入香房，香房裡便行。裡便
行。新郎佢慢慢，慢慢將新娘來走近。挑起頭帕，心
內笑歡欣。睇下申時都已過，天黑一陣陣。一陣陣。
不期紅日，已西沉。已西沉。（短序收）

〔完〕